



SIARAN MEDIA

JABATAN HAL EHWAL VETERAN, KEMENTERIAN PERTAHANAN

UNIT KOMUNIKASI KORPORAT JHEV ATM, TINGKAT 20, MENARA TH PERDANA, JALAN SULTAN ISMAIL, 50250 KUALA LUMPUR

TEL : 03-2050800

FAKS : 03-26917564

Jabatan Hal Ehwal Veteran ATM (JHEV ATM) telah mengeluarkan kenyataan berikut:-

MAJLIS PENYERAHAN KUNCI RUMAH INISIATIF PERUMAHAN VETERAN ATM PERINGKAT NEGERI JOHOR TAHUN 2023 OLEH YB DATUK SERI HAJI AHMAD BIN HAJI MASLAN

Pontian, 14 Okt 2023 – Yang Berhormat Datuk Seri Haji Ahmad Bin Haji Maslan Timbalan Menteri kewangan merangkap Ahli Majlis Veteran Kebangsaan diiringi oleh **Mejar Jeneral Zambery Jefry bin Haji Darus, Ketua Pengarah Jabatan Hal Ehwal Veteran ATM (JHEV ATM)**, telah menyempurnakan **Majlis Penyerahan Kunci Rumah Inisiatif Perumahan Veteran ATM Peringkat Negeri Johor Tahun 2023** bertempat di **Lot 10823 Mukim Ayer Baloi, Pontian, Johor**. Pada majlis tersebut, **YB Datuk Seri Haji Ahmad Bin Haji Maslan** telah menandatangani plat perasmian dan menyerahkan replika kunci rumah kepada 3 penerima Veteran ATM iaitu Encik Bagindak bin Dg. Talisang berusia 80 tahun, Puan Siti Zabedah binti Mohd Ali berusia 65 tahun dan balu veteran Puan Norazizah binti Mohd Taff yang berusia 51 tahun.

Kementerian Pertahanan sentiasa peka berkenaan kebajikan Veteran ATM dan mengambil berat isu perumahan Veteran ATM. Isu perumahan Veteran ATM telah dibincangkan melalui Majlis Veteran Kebangsaan (MVK). Program Inisiatif Perumahan Veteran ATM merupakan salah satu strategi inisiatif Peningkatan Kualiti Hidup di bawah Pelan Strategik Mindef dalam Teras 7. Strategi ini memberi penekanan dalam usaha membantu Veteran ATM yang berpendapatan rendah atau miskin dengan menyediakan tempat kediaman yang lebih kondusif dan selesa. Ianya merangkumi dua skop kerja iaitu membina kediaman baharu dan membaikpulih rumah Veteran ATM mengikut syarat yang telah ditetapkan. Kementerian Pertahanan akan terus berusaha untuk mencari inisiatif baru dan terus membuat penambahbaikan ke atas skim-skim bantuan sedia ada dalam usaha memperkasakan dan meningkatkan kualiti hidup Veteran ATM.

Program ini merupakan kerjasama erat di antara Jabatan Hal Ehwal Veteran ATM (JHEV ATM) dengan Syarikat Perumahan Negara Berhad (SPNB). Program Rumah Mesra Rakyat (RMR) ini diwujudkan oleh SPNB bagi membantu golongan berpendapatan isi rumah di bawah RM 3,000 yang tidak mempunyai rumah atau tinggal di rumah usang tetapi mempunyai tanah untuk membina rumah sendiri yang sempurna dan selesa. Veteran ATM boleh membuat permohonan Rumah Mesra Rakyat (RMR) di mana rumah akan dibina atas tanah sendiri dengan kos yang lebih rendah berbanding projek perumahan lain. Melalui kuota program ini, Veteran ATM akan menerima dua peringkat bantuan iaitu subsidi dibawah Skim Rumah Mesra Rakyat yang dikawal selia oleh SPNB berjumlah RM 20,000.00 dan peringkat kedua bantuan perumahan JHEV ATM berjumlah RM65,000.00 di Semenanjung Malaysia dan RM75,000.00 di Sabah & Sarawak. Manakala kos siling baik pulih rumah sebanyak RM17,000.00 seunit.

Pada tahun 2023, Kementerian Pertahanan telah memperuntukkan sebanyak **RM 5.7 juta bagi menampung pembinaan 170 rumah baharu dan 40 baik pulih rumah Veteran ATM**. Kriteria pemilihan Program Inisiatif Perumahan Veteran ATM terbuka kepada Veteran ATM atau balu yang mana pendapatan isi rumah di bawah jadual Pendapatan Garis Kemiskinan (PGK) yang telah ditetapkan. Bagi permohonan baik pulih ialah rumah yang didiami adalah rumah sendiri atau pusaka dan bukan rumah yang disewa. Skop bantuan baik pulih hanya melibatkan komponen-komponen asas rumah sahaja seperti bumbung, dinding, lantai, tingkap yang tidak melibatkan struktur asal rumah. Manakala bagi permohonan bina baharu pemohon mestilah belum memiliki rumah atau mendiami rumah yang terlalu uzur, tidak selamat diduduki, dan tidak ekonomi untuk dibaiki serta memiliki tanah sendiri.

Turut hadir dalam majlis tersebut adalah wakil dari Syarikat Perumahan Negara Berhad (SPNB), persatuan-persatuan Veteran ATM disekitar negeri Johor dan pengurusan JHEV ATM.

Untuk sebarang pertanyaan, sila hubungi **Muhammad Izzat Siraj Bin Mohd Iyas Zainal Ravi**, Ketua Unit Komunikasi Korporat JHEV ATM (017-965 3755) atau **Mejar Johadi bin Jema'at**, Pengarah JHEV ATM Cawangan Negeri Johor (016-7168116).

JABATAN HAL EHWAL VETERAN ATM

KEMENTERIAN PERTAHANAN

14 OKTOBER 2023